

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 448 del 27/02/2025

En domenia ai 2 de mèrz domesdì cères e faceres tradizionèles viventerà l paisc.

La Majon di Fascegn tol pèrt a la defilèda de Carnascèr ta Ciampedel

[ladino] Sessaben che ta Ciampedel i é do a endrezèr Carnascèr! La Majon di Fascegn scomenza via col tor pèrt a chest event, desche zenza endrezà con gran gaisa dal Comitad per la manifestazions de paisc, la lingia de scomenzadives metudes a jir per festejèr sie cedeàn bel toron, chel di 50 egn.

Per fèr chest tant l'à de besegn de sia jent, de muie de fascegn apontin. Belimpont en domenia ai 2 de mèrz, da mesa les trei domesdì, te Piaz de Ciampedel, chi che parteziperà a la defilèda poderà troèr ence n grum de personajes suté fora da la tradizion del carnascèr fascian veia e veiora, che fosc no duc cognosc amò aldidanché. Ponton via da chel mat golous de Jandeluvio, enschin a la Catertempora che bel junfon la sturterà via l Carnascèr. Donca, se siede curiosc l envit l é chel de tor pèrt al Carnascèr de Ciampedel con n cèr, opuramenter regolé e co la faceres de legn tradizionèles. Sessaben che speton ence la jent che vel vegnir a ge vardèr a dut chest bel rebalton e a cercèr n bon marendel. No mencerà de bela musega per se fèr doi bai en compagnia.

Con chest se vel palesèr che anter i ladins de Fascia la tradizion, e ence chela del Carnascèr, la é amò viva e siantiva, e sentuda amò anchecondì dai fascegn. Tel temp de Carnascèr, n temp a la reversa, se pel tor l'ocajion per se goder, fèr da mat, se grignèr e fèr festa en compagnia. A chesta vida se tegn su la tradizion de nesc veies, che ence enlouta i podea se molèr fora mingol de più che tel rest del an, i magnèa magnadiva più bona e ensaorida e i se dajea la mans dintorn per se tor per man un col auter, dant che rue Ciapuìn e l temp de Careisema, olache enveze dut l era chiet, out al spirit e a la religion.

A la fin de jené, a Belun, l grop de la Mèscres de Dèlba e Penia col didament del Museo Ladin de Fascia à prejentà la carateristiches particulères del Carnascèr fascian al Forum delle Mascherate Arcaiche Dolomitiche, endrezà dal Museo Maschere Dolomitiche de Gianluigi Secco. Chest Museo l coordenea la "Rete delle Mascherate Arcaiche Dolomitiche", nasciuda apontin l an passà, che la tol ite gropes de la provinzia de Belun, de la Val de Fascia e de la Carnia. Endèna l forum la Rei à portà dant la proponeta de candidatura de la mascherèdes arcaiches de la Dolomites acioche les dovente ben immaterièl del Unesco.

La partezipazion de la Majon di Fascegn al Carnascèr de Ciampedel la é sostegnuda dal pont de veduda finanzièl da la Region Trentin-Sudtiroł delaite da la scomenzadives per la zelebrazion del 50eisem cedeàn de fondazion del Istitut Cultural Ladin.

De altra informazions sun:

<https://www.istladin.net/it/e/123>

(pc)